

# An Cód Eorpach in aghaidh na hAilse, an 5ú heagrán

## 14 bhealach ar féidir leat cuidiú chun ailse a chosc

Bileog Eolais



### Moladh 9 do Dhaoine maidir le Tosca ag an obair is cúis le hailse

**Cuir thú féin ar an eolas faoi na tosca is cúis le hailse ag an obair, agus iarr ar d'fhostóir thú a chosaint orthu. Lean treoracha sláinte agus sábháilteachta i d'ionad oibre i gcónaí.**

#### Príomhachóimre

- Cuireann nochtadh do thosca is cúis le hailse (carcanaiginí) ag an obair le cion mór básanna a bhaineann leis an obair san Aontas Eorpach (AE).
- Is iad na 10 gcarcanaigin cheirde is tábhachtaí is cúis le thart ar 85 % de na básanna ceirde ar fad.
- De réir ordlathas an rialaithe chun deireadh a chur le hoibreáin ghuaiseacha agus feabhas a chur ar dhálaí oibre, is iad sin na bealaí is éifeachtaí chun riosca na hailse ceirde a laghdú.
- Iarr ar d'fhostóir thú féin agus do chomhghleacaithe a chosaint ar thosca is cúis le hailse.
- Ba cheart d'oibrithe treoracha sláinte agus sábháilteachta a leanúint san ionad oibre chun a nochtadh do charcanaiginí ceirde agus a riosca ailse ceirde a laghdú.

#### Nochtadh ceirde agus ailse

Is ábhar mór imní don tsláinte phoiblí in AE é nochtadh do thosca is cúis le hailse ag an obair. Mar sin féin, tá faisnéis chruinn in easnamh maidir le leitheadúlacht na dtosca sin is cúis le hailse.

In 2023, thuairiscigh an Gníomhaireacht Eorpach um Shábháilteacht agus Sláinte ag an Obair (EU-OSHA) gurbh iad radaíocht ultraivialaite (UV) na gréine, sceitheadh innill díosail, beinséin, silice chriostalata inanalaithe, formaildéad, cróimiam heicsifhiúsach, agus a chomhdhúile neamhorgánacha agus deannach adhmaid na carcanaiginí is forleithne i sé Bhallstát de chuid AE (an Fhionlainn, an Fhrainc, an Ghearmáin, an Ungáir, Éire agus an Spáinn). Fuarthas amach sa staidéar sin gur nochtadh 47 % d'oibrithe sa tseachtain oibre roimhe sin do cheann amháin ar a laghad de na 24 thoisc riosca ailse a áiríodh sa suirbhé.

Tá nochtadh do charcanaiginí san ionad oibre forleathan agus is minic a ghintear iad trí phróiseas, mar shampla, astaíochtaí mótaí díosail agus mých táthaithe. Is minic a nochtar oibrithe do níos mó ná carcanaigin amháin. Mar shampla, tá nochtadh do radaíocht UV na gréine, silice chriostalata, agus mých táthaithe forleathan in earnálacha éagsúla ar fud AE.

Is cúis mhór imní í ailse scamhóg toisc go mbíonn roinnt mhaith carcanaiginí scamhóg san ionad oibre (e.g. aispeist, silice chriostalata, mých táthaithe, arsanaic, cróimiam heicsifhiúsach, nicil, caidmiam, beirilliam, deatach tobac tánaisteach, radón, sceitheadh innill díosail, agus hidreacarbóin il-timthriallacha aramatacha).

Ba cheart d'fhostóirí a bheith ar an eolas faoi oibreáin is cúis le hailse agus faoi imthosca san ionad oibre agus ba cheart dóibh bearta rialaithe a chur chun feidhme tríd an ordlathas rialaithe a leanúint. Leagtar síos sa straitéis sin gur cheart deireadh a chur le hoibreáin ghuaiseacha agus iad a ionadú roimh rialuithe innealtóireachta agus riaracháin. Níor cheart trealamh cosanta pearsanta a úsáid ach amháin mar rogha dheireanach.


#### Gníomhartha le do riosca ailse a laghdú

**Iarr ar d'fhostóir thú a chosaint ar thosca is cúis le hailse ag an obair.** Cuir thú féin ar an eolas faoin riosca nochtadh d'oibreáin fhisiceacha agus cheimiceacha a mhéadaíonn do riosca ailse agus fadhbanna sláinte eile. Tá d'fhostóirí freagrach as na hoibreáin sin agus na rioscaí a bhaineann leo a rialú. Ba cheart d'oibrithe a iarraidh ar a bhfoistóirí an riosca ó nochtadh d'oibreáin is cúis le hailse ag an obair a chosc nó a laghdú tríd an ordlathas rialaithe a chur i bhfeidhm.

**Lean treoracha éifeachtacha sláinte agus sábháilteachta san ionad oibre** i gcónaí chun do nochtadh do charcanaiginí ceirde agus an riosca ailse ceirde a laghdú.

**Maidir le fostóirí: déan an t-ordlathas rialaithe a chur chun feidhme i d'ionad oibre.** Is é díothú an beart rialaithe is éifeachtaí, is é sin an ghuaire a bhaint den ionad oibre (e.g. gan aispeist a úsáid), agus ina dhiaidh sin oibreán ceimiceach carcanaigineach a ionadú le hoibreán ceimiceach nach bhfuil chomh guaiseach céanna. I measc na samplaí de rialuithe innealtóireachta tá bearta ar nós an fhoinsé a chur i gceangal, eastóscadh aeir a úsáid gar don fhoinsé, bacainní a úsáid, agus an t-achar idir an t-oibrí agus an fhoinsé a mhéadú. Is féidir a áireamh ar na rialuithe riaracháin an t-am a nochtar oibrithe a laghdú agus sceidil sealoibre a fheabhsú. Níl na cineálacha rialuithe sin chomh héifeachtach céanna le díothú agus ionadú toisc go mbíonn cothabháil chúramach de dhíth orthu de ghnáth agus go gcoinníonn buiséad leordhóthanach a n-éifeachtacht. Níor cheart trealamh cosanta pearsanta a úsáid ach amháin mar rogha dheireanach agus éilíonn sé feistiú leordhóthanach ar an oibrí, oiliúint agus teagasc, agus comhar oibrithe. Níl teorainneacha aitheanta um nochtadh sábháilte ag roinnt mhaith carcanaiginí ceirde; dá bhrí sin, ba cheart nochtadh a laghdú a mhéid is féidir go réasúnta.

Ba cheart measúnuithe riosca láidre agus bearta láidre faireachais sláinte a chur i bhfeidhm.



**Fíor 1: Ordathas rialuithe.** Ba cheart ordathas na rialuithe a leanúint ón mbarr go dtí an bun. Oiriúnaithe ó dizain/AdobeStock.com

**Le haghaidh seirbhísí sláinte ceirde** (e.g. sláinteolaithe ceirde, lianna ceirde): Tacú le fostóirí agus le hoibrithe chun ailsí ceirde a chosc. Ba cheart baint a bheith ag seirbhísí sláinte ceirde le

forbairt, cur chun feidhme agus tástáil na mbearta rialaithe uile, lena n-áirítear gléasanna cosanta pearsanta tástála oiriúnaithe chun a áirithiú go bhfuil anáilaitheoirí roghnaithe ag oibrithe den mhéid cheart agus go bhfuil an séala aghaidhe leordhóthanach chun an chosaint a bhfuiltear ag súil léi a sholáthar. D’fhéadfadh sé sin an t-ualach fisiceach ar oibrithe a mhéadú, agus dá bhrí sin ba cheart úsáid na bhfeistí sin a bheith ina rogha dheireanach.

**Comhthairbhí chun galair neamhtheagmhálacha a chosc ag a bhfuil fachtóirí riosca agus deiseanna comhchosúla chun an tsláinte a chur chun cinn**

Cuireann roinnt mhaith carcanaiginí a fhaightear in áiteanna oibre le galair neamhtheagmhálacha eile freisin. Mar shampla, d’fhéadfadh nochtheadh do roinnt carcanaiginí scamhóg (e.g. silice chriostalta agus mých táthaithe) a bheith ina chúis le galair riospráide eile freisin, ar nós fhiobróis na scamhóige nó an ghalair scamhóige thoirmeascaigh ainsealaigh, agus d’fhéadfadh sé an riosca galar cardashoithíoch a mhéadú.

D’fhéadfadh dálaí éagsúla deirmeolaíochta, ar nós greannú craicinn, frithghníomhuithe ailléirgeacha, nó deirmitítis, a bheith san áireamh sna hiarmhairtí gearrthéarmacha a bhaineann le nochtheadh do roinnt carcanaiginí ceirde. Trí nochtheadh guaiseach a sheachaint agus trí chleachtais shábháilte san ionad oibre a chur chun feidhme, laghdófar an riosca go dtarlódh gortuithe, timpistí agus neamhoird mhatánchnámharlaigh.

**Tuilleadh eolais faoi na tosca éagsúla is cúis le hailse san ionad oibre**

| Tionscal                                                                                | Oibreáin                                                                                                                                                                                                                                                                                                                                                                                                                                                                                       | Láithreáin siada nó cineál siadaí                                                                                                            |
|-----------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|----------------------------------------------------------------------------------------------------------------------------------------------|
| Talmhaíocht, foraoiseacht, agus iascaireacht                                            | Radaíocht UV na gréine, silice chriostalta inanáilaithe, mých táthaithe, sceitheadh innill díosail, aflatocsainí, líondán                                                                                                                                                                                                                                                                                                                                                                      | Ailse scamhóg, ailse craicinn, ailse ae, líomfóma neamh-Hodgkin                                                                              |
| Mianadóireacht agus cairéalacht                                                         | Aispeist, silice chriostalta inanáilaithe, mých táthaithe, arsanaic, cróimiam heicsifhiúsach, nicil, caidmiam, beirilliam, deatach tobac tánaisteach, radón, sceitheadh innill díosail, hidreacarbóin il-timthriallacha aramatacha, beinséin, radaíocht UV na gréine                                                                                                                                                                                                                           | Ailse scamhóg, méisitílióma, géarleocaíme mhiailóideach                                                                                      |
| Monaraíocht                                                                             | Aispeist, silice chriostalta inanáilaithe, mých táthaithe, arsanaic, cróimiam heicsifhiúsach, nicil, caidmiam, beirilliam, deatach tobac tánaisteach, radón, sceitheadh innill díosail, tarra guail, hidreacarbóin il-timthriallacha aramatacha, deannach adhmaid, deannach leathair, défheinilí polaclóirínithe, beinséin, formaildéad, radaíocht ianúcháin, 1-3 bútaidh-éin, aiminí aramatacha, trichlóireitiléin, orta-tolúidín, clóiríd vinile, aigéid neamhorgánacha láidre, radaíocht UV | Ailse scamhóg, méisitílióma, ailse sróine, ailse craicinn, géarleocaíme mhiailóideach, ailse lamhnáin, ailse ae, ailse duáin, ailse larainge |
| Soláthar leictreachais, gáis, gaile agus aerchóiriúcháin                                | Aispeist, silice chriostalta inanáilaithe, défheinilí polaclóirínithe, hidreacarbóin il-timthriallacha aramatacha                                                                                                                                                                                                                                                                                                                                                                              | Ailse scamhóg, méisitílióma, ailse lamhnáin, ailse ae                                                                                        |
| Soláthar uisce, séarachas, agus gníomhaíochtaí bainistithe agus feabhsúcháin dramhaíola | Aispeist, silice chriostalta inanáilaithe, radaíocht UV na gréine, sceitheadh innill díosail                                                                                                                                                                                                                                                                                                                                                                                                   | Ailse scamhóg, méisitílióma, ailse craicinn                                                                                                  |
| Tógáil                                                                                  | Radaíocht UV na gréine, aispeist, silice chriostalta inanáilaithe, mých táthaithe, arsanaic, cróimiam heicsifhiúsach, nicil, caidmiam, beirilliam, deatach tobac tánaisteach, radón, sceitheadh innill díosail, tarra guail, hidreacarbóin il-timthriallacha aramatacha, radaíocht UV                                                                                                                                                                                                          | Ailse scamhóg, ailse sróine, ailse lamhnáin, ailse craicinn                                                                                  |
| Trádáil mhórdhíola agus mhiondíola; deisiú mótarfeithicilí agus gluaisrothar            | Beinséin, trichlóireitiléin, sceitheadh innill díosail, hidreacarbóin il-timthriallacha aramatacha                                                                                                                                                                                                                                                                                                                                                                                             | Géarleocaíme mhiailóideach, ailse duáin, ailse scamhóg                                                                                       |
| Iompar agus stóráil                                                                     | Aispeist, silice chriostalta inanáilaithe, mých táthaithe, arsanaic, cróimiam heicsifhiúsach, nicil, caidmiam, beirilliam, deatach tobac timpeallachta, radón, sceitheadh innill díosail, hidreacarbóin il-timthriallacha aramatacha                                                                                                                                                                                                                                                           | Ailse scamhóg                                                                                                                                |
| Cóiríocht agus gníomhaíochtaí seirbhísí bia (fáilteachas)                               | Deatach tobac tánaisteach                                                                                                                                                                                                                                                                                                                                                                                                                                                                      | Ailse scamhóg                                                                                                                                |
| Riarachán poiblí agus cosaint; slándáil shóisialta éigeantach                           | Hidreacarbóin il-timthriallacha aramatacha, aispeist, sceitheadh innill díosail, radaíocht UV na gréine                                                                                                                                                                                                                                                                                                                                                                                        | Méisitílióma, ailse lamhnáin, ailse scamhóg, ailse craicinn                                                                                  |
| Gníomhaíochtaí sláinte daonna agus oibre sóisialta                                      | Oibreáin antai-neoplasmacha, radaíocht ianúcháin, deatach tobac tánaisteach, formaildéad, ocsaíd eitiléine                                                                                                                                                                                                                                                                                                                                                                                     | Géarleocaíme mhiailóideach, géarleocaíme mhiailóideach agus leocaíme mhiailóideach ainsealach, ailse útarach, ailse scamhóg, ailse cíche     |
| Gníomhaíochtaí seirbhíse eile (deisiú, tirimghlanadh, gruagaireacht)                    | Eatánól, trichlóireitiléin, radaíocht UV                                                                                                                                                                                                                                                                                                                                                                                                                                                       | Ailse duáin, ailse craicinn                                                                                                                  |

**Faigh eolas faoi na beartais a thacaíonn le deireadh a chur le nochtheadh do charcanaiginí ceirde nó é a laghdú**

Ba cheart do ghníomhaireachtaí rialtais (e.g. cigireachtaí saothair), lucht ceaptha beartas, agus ceardchumainn cabhrú chun rialacháin agus beartais atá ann cheana a fhorfheidhmiú (e.g. an Treoir maidir le Carcanaiginí agus Só-ghineacha agus comhaontuithe idirphlé shóisialta). Ba cheart cistí a bheith ar fáil chun tacú le measúnú agus bainistíocht riosca i gcuideachtaí beaga agus meánmhéide agus le haghaidh daoine féinfhostaithe, agus chun idirghabhálacha san ionad oibre a thionscnamh agus a mheas ar leibhéal na tionsclaíochta, ar an leibhéal náisiúnta agus ar leibhéal AE.

**Tagairtí**

Cherrie et al. (2024). Ann Work Expo Health. 68(7): 673-677. PMID 38768378

EU-OSHA (2023). Occupational cancer risk factors in Europe – first findings of the Workers’ Exposure Survey. Le fáil ó: <https://osha.europa.eu/en/publications/occupational-cancer-risk-factors-europe-first-findings-workers-exposure-survey>

GBD 2016 Occupational Carcinogens Collaborators. (2016). Occup Environ Med. 77(3):151-159. PMID: 32054819

An Gníomhaireacht Idirnáisiúnta um Thaighde ar Ailse. (2012). *Chemical agents and related occupations*. IARC Monographs 100F

An Gníomhaireacht Idirnáisiúnta um Thaighde ar Ailse. (2012). Monographs on the Evaluation of Carcinogenic Risks to Humans Volume 100D

Olsson & Kromhout. (2021). Mol Oncol. 15(3):753-763. PMID: 33544948

Takala et al. (2014). J Occup Environ Hyg. 11(5) 326–337. PMID: 24219404

An saothar dar teideal *European Code Against Cancer 5<sup>th</sup> edition: 14 ways you can help prevent cancer* arna fhoilsiú an Gníomhaireacht Idirnáisiúnta um Thaighde ar Ailse (IARC) in 2025, a choinníonn an cóipcheart sa bhunsaothar Béarla ([Understand ECAC5 | Fact Sheets and Policy Briefs](#)). Tá údarú tugtha ag sealbhóir an chóipchirt don Aontas Eorpach aistriúchán Gaeilge den eagrán a chur ar fáil, arb é amháin atá freagrach as an aistriúchán.

© An tAontas Eorpach, 2026

Chun eilimintí nach bhfuil faoi úinéireacht an Aontais Eorpaigh a úsáid nó a atáirgeadh, d’fhéadfadh sé gur ghá cead a iarraidh go díreach ar na sealbhóirí cirt faoi seach.